



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tir\_yimiyim



tir yimiyim

TAPAK 7

**Manuel Neuer yiruba ajanga CL nung Atalanta den masayatetsü**

**Iran totzö ayudak aser yangludak tesem amak**



VOL. XXIII ISSUE NO. 145 (ADOK 145) DIMAPUR TENTONÜ (MONDAY) METSÜREMI (MARCH) 09, 2026 ₹ 5.00

## MTLT-i MMC nem tenüngsang agütsür

**Dimapur, March 8, 2026 (TYO):** Mokokchung Municipal Council-i jila nung parking fees sarutetba nungi ward 18 prong nung streetlights enokba atema tenüngsang agütsür ta Mokokchung Town Lanur Telongjem (MTLT)-i metetdaksüogo.

Iba shisa taka inyakym lendong nungi kümzüka alitsü, auyaba aser lendong ajemtsü aser infrastructure tajungba akümtsü atema inyakba lir aser Municipal Council-i Mokokchung jila tajungba kümduksütsü tangatetba aliba jungkai adoka sayur ta MTLT-i sangdong ka nung ashi.

Senotsü timi amshiba ya teindang nisung ka inyaksangshi lir. MMC-i sarutetba senotsü public ajungtsü asoshi amshiba ajanga Council longjema aliba, amalitep aliba aser purapitetba sayur ta parnokisa ashi.

MMC-i parking fees nungi sarutetba sen ajanga street light enokba ajanga senotsü tashishitsü melii amshiba lir aser iba ajanga sensotem dang tax sen timi amshidar ta sayur ta MTLT-isa metetdaksüogo.

Chairperson Imkongchuba Pongen aser councillors lenisüba kübok Mokokchung Municipal Council-i jila nung maparen tiptema aser akanga inyakba sayuogo ta parnokisa ashi.

2024 nung Nagaland Municipal election agia MMC tenteter küm ana ano majungdang terenlok mapa balala inyakba atema kanga pelar. MMC-i maneni nenok tsüngda amalitepa jila tajungba renloka anir aotsü ayongzüker aser MTLT-ia nenok pusema nungitsü ta Tir Imnaonen Pongen aser Tongti Tezülur Moarenba Ozukum nati sangdong nung shiogo.

## NPCC-i Imna Along den ashishiteper NBCC-i Vande Mataram tetuyuba magizüker

**Dimapur, March 8, 2026 (TYO):** Nagaland Assembly nung Imna Along-i Nagaland nung alir dang Vande Mataram atentsü metena jembiba atema khuret abener aser pa dang Nagaland nung alirtem manisatsü ayongzüker ta Nagaland Pradesh Congress Committee (NPCC)-i sangdong ka nung metetdaksüogo.

Nagaland putiotsü aser maitsü khenyongi balaka aser Arrla 371(A) kübok kümzüka ayuba state lir. Iba Arrla ya odang anguba masü saka Naga nung tamangba yimsü, sobaliba inyakym, özüngtem aser inyaksangshi kümzüka ayutsü ta tenangzüka agia latetba lir ta NPCC-i ashi.

India nüjiso atema inyakba maparen nung Vande Mataram ya tongtipang liasü ta agizüker aser iba ken nung Hindu nung tsüngremtem aser tamangba yimsü enoksema lir. Anungji Nagaland nungi lennir kati Naga nung dang iba ken atentsü tetuyuba sülen anidaksüla ta ashibaji kanga shisamaka aser tebilemtsü mabenba tangatetba lir, kechiyong Nagaland loktiliba ya Khristan yimsü nung amendaka lir, ta NPCC-isa metetdaksü.

Naga nung teimba Khristan tamangertem lir aser asen arogotemi asen tangatetba, lokti aser yimtenren maitsü nung tongti shilem agir. Anungji iba maitsü menentsütsü mesüra

mezüngmeshitsü atema tashiyim agi inyakym benokba magizüktsüla ta parnokisa ashi.

BJP aser parnok den sendaktepa aliba teloktemi shisaliok rejutem, school aser college tem nung parnok tangatetba benoktsü meranger, anungji nübortemi kanga kümküma alitsüla ta NPCC-isa ayongzüko.

Imna Along-i Nagaland nung alirtem anisaba anentsü ayongzüker. Asen loktiliba nung sobaliba aser tamangba yimsü tamendakdak yoka machitsüla ta NPCC-isa metetdaksüogo.

Nagaland nung nübortem atema noktaker, temzüng kümzüka ayur aser tamangba yimsü o inyaksangshi kümzüka ayuba lennirtem nüngdaker ta NPCC-isa ashi.

Nagaland Baptist Church Council (NBCC)-ia National Anthem jakdang Vande Mataram atentsü tetuyuba magizükba metetdaksüogo.

Nagaland sorkari iba onük benoka lemsatepba aser MLA teimba kati Ministry of Home Affairs-i tuyuba anema noktaker atema tenüngsang agütsür ta NBCC-i ashi.

National Anthem jakdang national song atentsü tetuyuba anema Nagaland nung arogotem, civil society teloktem, kaketshir teloktem aser political party temi ola adokba atema tenüngsang agütsür ta NBCC-isa ashi.

## NFHRCC-i 2nd Phase Work Order atema nenshir

**Dimapur, March 8, 2026 (TYO):** Dimapur nung amenoka aliba kin hoho 13-i tawa tu NPWD, Road & Bridges dang March 31, 2026 tashi nung Work Order agütsütsü mapang züngzüksüogo saka tang tashi bangdak Department nungi telangzüba kecha mali ta NFHRCC-i nenshiogo.

Iba ya Foothills Road kübok surveyed areas nung tanüngba divisions asoshi lir aser open

tender inyakym ajanga Work Order agütsütsü mapang züngzüka lir ta parnoki ashi.

Sorkari 2 Lane Foothills Road yangluba ya tamakok ngudaksüra kin hoho ajaki özüngi melaba ama lungkak aittsü renema alitsü ayongzüker. Nagaland sorkari Rs.148.5 Cr indang 1st Phase SASCII Loan Scheme nung Rs. 248.5 Crores shi endokogo ta NFHRCC-isa ashi.

NFHRCC-isa Nagaland

sorkar aser bangdak department dang SASCII kübok Two-Lane Road construction mezüng tembangtsü aser iba sülen National Highways Act ama four-lane road construction tenzüksü mepishia metetdaksüogo.

SASCII kübok tang teinyakdak two-lane road construction ya MoRTH (NHAct) kübok four lane road den memeyoktepsüla ta The Media Cell, NFHRCC-i sangdong ka nung ashi.

## MLA & Advisor Dr. Longrineken alima nungi pilaogo



**Dimapur, March 8, 2026 (TYO):** 29-Jangpetkong Assembly Constituency nungi taoba MLA aser Advisor Dr. Longrineken March 7 nü alima nungi pilaogo. Pa arishi küm 58 liasü.

Asür Dr. Longri-i pa kinungsü den jala ka aser jabaso ka toktsür ogo. Deobarnü Chümoukedima kübok Aoyim yimtsüng nung pa den asüpila sentep sentong agir Naga Cemetery, Dimapur nung pa mang remogo.

Dr. Longri-i 12 buba Nagaland Legislative Assembly nung Advisor aser Parliamentary Secretary inyak aser iba sülen 13 buba Nagaland Legislative Assembly nunga takok ngua Law & Justice Advisor inyaka liasü.

Chief Minister Neiphiu Rio aser Nagaland Legislative Assembly (NLA) Speaker Sharingain Longkumer nati sangdong balala ajanga taoba MLA Dr. Longrineken asüba atema temlung raksaba metetdaksüogo.

"Kü den külemi inyaker aser 29th Jangpetkong Assembly Constituency nungi taoba MLA Dr. Longrineken kanga dang ajungbena asüba osang angashia kanga aoksar aser temlung raksar" ta CM Dr. Rio-i ashi.

"Asür Dr. Longri ya public tenzüker tenendak ka liasü. Pa ya ajemalu aser taochi aketba nisung ka liasü. Pa kanga dang tenendak aser ajemalu tebilemtsü khuret abenba nisung ka liasü. Pa den külemi inyaksemdang pa ya

tesüngjem aser temlungtetba lennir ka liasü. Pai o kanga mejembi saka nübor tenzüka nung bendanga agütsüba nisung ka liasü" ta Rio-isa metetdaksü.

"Dr. Longrineken asüba ya pa meteta alir ajak asoshi takoksa tulu ka lir. Aor aser talisa Khar nung asoshi akhümket lennir aser len sayur ka akoksaogo" ta CM Dr. Rio-isa metetdaksü.

Paisa asüri toktsür aoba kibong den asükhu lemsatepba den tesünep meshia sarasademtsüba shiogo.

NLA Speaker Sharingain Longkumer-ia Dr. Longrineken asüba atema kanga temlung shirangba metetdaksüogo.

"Dr. Longrineken-i meimchir maparen nung kanga shilem agi. Indian Institute for Peace, Disarmament and Environmental Protection, Nagpur kübok Indian Campaign to Ban Landmines nung State Coordination nung pai mulungsoa yaritep. Paisa Geneva Call, Switzerland dena külemi inyaksemogo" ta Sharingain-ia ashi.

"Pai item maparen nung shilem agiba ajanga yimjung, human rights aser humanitarian tangatetba ajungkettsü asoshi bendanga agütsüba sayuogo" ta paisa ashi.

"Iba tejashi mapang ni aser 14 buba Nagaland Legislative Assembly züngsem ajak tenüng nung asür kibong den mangyimba lemsateper aser Tulusang Tsüngremi nenok tashi agüjang ta sarasademtsür" ta Sharingain-isa metetdaksü.

BJP Nagaland-ia Dr. Longrineken asüba atema temlung raksaba aser mangyimba metetdaksüogo.

Asür Dr. Longrineken ya akhümket lennir ka aser bendanga agütsüba public tenzüker ka liasü. Pai public tenzüka aser state renloksü asoshi bendanga agütsüba teti bilemtepsüla ta Media Cell, BJP Nagaland-i sangdong ka nung ashi.

"Dr. Longrineken-i party kanga junga tenzüka aser senmang tajung yutsüba asoshi kanga pelar. Pa asüba ya par kibong atema dang masü saka Nagaland nung alirtem asoshi takoksa ulura lir" ta parnoki ashi.

BJP Nagaland-isa asür kibong aser temeimertem den asükhu lemsatepba den tashi aser tesünep meshitsüogo.

Rural Development Minister Metsubo Jamir-ia sangdong ka nung Dr. Longrineken asüba atema aoksaba aser mangyimba metetdaksüogo.

"Kü medemer aser külemi inyaksemer Dr. Longrineken ajungbena asüba osang angashia kanga aoksar. Pa ya kanga dang ajemalu aser tenendak nisung ka liasü aser pai kanga dang bendanga inyak" ta Minister Metsubo-i ashi.

"Pa dang mapang tatsüka inyaksemdang pa dak ajemalu aser tangatetba tajung aliba ajitet. Pa asüba ajanga ni medemer tajung ka akoksaogo. Par yimer aser Aortemi lanur lennir tajung ka akoksaogo" ta paisa ashi.





March 08, 2026 nü International Women's Day anogomong nung Kerala nung Lok Sabha nung Opposition lenir, Rahul Gandhi-i tetsür kaketshirtem den külemi chiyunga sensaksemba mapang tangokba noksa nung angur.

### Inyakyim alema inyakba atema Bengal sorkar dang telangzüba meshir

**New Delhi, Metsüremi/ March 08 (Agencies):** Honibarnü linük Tir, Droupadi Murmu-i West Bengal semdangba mapang nung ketdangsertemi lateta aliba inyakyim alema inyakogo, ta shia Centre sorkari West Bengal sorkar dang nungi telangzüba meshir.

Centre sorkari state Chief Secretary B.P. Gopalika dang Tiri semdangba mapang nung security inyakyim alema inyakba, tanendak aser senzusempongba inyakyim alema inyakba atema telangzüba agüjang, ta tuyu.

Union Home Secretary-i shidi ajanga West Bengal chief secretary dang, linük Tiri semdangba mapang nung 'Blue Book' rules alema inyakba, tesem aser senzusempongba tsütsü lateta aliba inyakyim alema inyakba atema telangzüba agüjang, ta metetdaksü.

'Blue Book' ya linük Tir, tatong Tir, Ato kilonser aser parnok kibongtem nem security agütsüsü atema lateta aliba temzüngtem lir.

Honibarnü Tir Murmu-i Bagdogra airport anasa tribal dak sendakba sentong nung nisung ishika dang adenshiba atema mepelaba metetdaksüba den külemi Bidhannagar nung masü saka tesem melenshir iba sentong ayongzüka aija liasü.

Laisa lai state semdangba mapang nung West Bengal Chief Minister Mamata Banerjee aser lar cabinet minister tem maliba atema aitsü.

Union Home secretary-isa West Bengal chief secretary dang, Tiri state semdangba mapang nung la agizüktsü atema chief minister, chief secretary aser DGP nung malibaji Blue Book nung keta aliba temzüngtem alema inyakba lir, ta metetdaksü.

Tir state tonga aruba mapang nung la agizüktsü atema Siliguri Mayor dang liasü, aser iba ya

inyakyim alema tuluka aibelenogo, ta parnoki metetdaksü.

Osang angazükba agi, Tir anenzükba tesem nung la metsümeshidak tzü-a maliasü, anungji iba dak sendakba nunga telangzüba agüjang, ta state sorkar dang tuyuogo.

Iba dak alia Tir anir aoba gari lenmang tiplen jana aika liasü, anungi kechiba iba lenmangji shim, ta state sorkar dang asüngdang.

Item inyakyim alema inyakba atema District Magistrate of Darjeeling, Commissioner of Police Siliguri aser Additional District Magistrate nung anema kechi inyak? ta state sorkar dang asüngdangogo.

Küm shia ayongzüka agiba tribal sentong ka nung adentsü atema Tir Murmu jaoka liasü. Iba sentongji Siliguri kübok Bidhannagar nung ayongzük saka ketdangsertemi tesem melenshiba agi iba sentong nung adentsü atema nisung ishika dang adenshi.

Honibar nikongdang Tir Murmu sentong agiba tesem tonga aruba mapang nung nisung ishika dang liasü aser airport nung la agizüktsü atema Siliguri Mayor, Gautam Deb dang liasü.

Tiri, "Mamata Banerjee ya keno amai lir. Ni-a Bengal jala ka lir. La jashiba agi asü masüar ni memetet. Ajisüaka kecha masü," ta lai metetdaksü liasü.

Laisa, "Iba sentong ya yangji (Bidhannagar) agi asübo kanga jungla. Iba tesemji kanga junger aser moapu tulu, anungji nisung aikati dentetla. Ajisüaka iba tesem nungji sentong agitsü atema kechiba state administration-i temelaba magütsüar ni memetet. Ashiko, state sorkari tribal nüburtem ajungtsü atema meinyakner asütsüa akok," ta metetdaksü.

Shidakba inyakyim nungbo, Tir kati state semdangba mapang nung chief minister

mesüra minister katibosa Tir agizüktsüla.

Honibarnü linük tatong Tir, C P Radhakrishnan-ia, Tiri West Bengal semdangba mapang metokmeperi aika alibaji kanga tia maka tatalokba ka lir; linük nung tematiba office kaji akhümketa züngshitsüla, ta metetdaksü liasü.

Tir Murmu-i state semdangba mapang West Bengal state sorkari Tir mezüngmeshiogo, ta shia Ato kilonser Narendra Modi-i, iba ya taaktsü mapa ka lir; Trinamool Congress-i tera alia oa inyakogo, ta aitsü.

West Bengal Chief Minister Mamata Banerjee-ibo, Bengal nung assembly election agitsü mapang ana nung lia yimtenren tsütsü tajangzük angutsü atema BJP-i Tiri jembiba o amshir, ta aitsü.

Mamata-isa, "District administration-i inyakyim anema meinyak. BJP-i par party tebilemba ataloktsü atema Tiri jembiba o akhüm-metsübur aser tim masüba nung amshir," ta ashi.

Inyakyim nung metokmeperi alibaji state sorkar tai masü aser sentong ayongzükertem aser

Airports Authority of India ajanga lir, ta laisa metetdaksü.

### Tanü Parliament nung budget senden tanabuba shilem tenzükter

**New Delhi, Metsüremi/ March 08 (Agencies):** Hombar nungi Parliament nung Budget senden tanabuba shilem tenzüktsü; senden tenzükba anogo nung Lok Sabha nung opposition-i Speaker Om Birla menden nungi agientsü atema bangzüng benoktsü.

Parliament nung kanga tongtibangsüa tang West Asia nung rara adoka aliba nung ajemdaker opposition-i sorkar aija tasüngdangba aika akatsüa akok.

Iran amakba atema sorkari US aser Israel maitzüba aser Russia dang nungi totzü alitsü atema US-i ang India nem temelaba agütsüsüa akümbaa densema onük balala nung ajemdaker opposition-i sorkar aitsütsü, ta osang angazükter.

Senden nungsa tawa West Bengal nung Special Intensive Revision (SIR) agiba sülen electoral rolls nungi tenüng lakh 60 jungnüa agienba onüka

süoktsüa akok. Taoba senden nung Lok Sabha Speaker, O Birla-i sorkar pusema inyaksangshiogo, ta pa nem tai tonglokja opposition nungi lenirtem aikati 'no-confidence resolution' renema lir.

TMC MP temi senden nung SIR dak sendakba benoktsüa akok. Ano külen Tir Droupadi Murmu-i Bengal semdangba mapang nung ketdangsertemi inyakyim alema inyakba atema BJP-i Trinamool Congress aitsütsüa akok.

Senden nungsa Electricity Amendment Bill benoka jembitsü aser budget senden mezüngbuba shilem nung anendaka aliba onüktem jembitsü.

Hombarnü Lok Sabha nung Question Hour magitsü, kechiyong Shillong nungi MP teinyakdak, Ricky Syngkon asüba atema pa nem akhüm agütsüsü. Pa February 19 nü asü.

### Maharashtra nung süngdong crore 300 atemtsü: CM Fadnavis

**Mumbai, March 08 (Agencies):** Maharashtra nung süngdong crore 300 atemtsü aser ibaji state nung arem litsü shilem 33 kümdaktsüsü atema lir, ta Amongnü state Chief Minister Devendra Fadnavis-i metetdaksü.

Mumbai nung 'Vriksh Vardhan: 2nd International Arboriculture Conference 2026' nung jembidang Fadnavis-i, "Arboriculture ajanga süngdong atema doctor tem adokdaksür, aser ibaji ajanga mongintemi süngdong health asadangtetba den külemi technology amshia süngdonglidong wazüka ayutsü atema telemtetba agiteter," ta ashi.

Paisa, tanü asüng hadir tasen ajanga tangbo scientific yimya nung süngdonglidong atemtsü atema inyaksangshiteter, ta metetdaksü.

"Technology ajanga süngdong ka laotsü aliba-a asadangteteter, süngdong ka kümzüktsü nungdakba mesüra kongsang kozüka aliba ajanga lendong ajurutsüa aliba-a

asadangteteter," ta pai metetdaksü.

Fadnavis-i, state sorkari tamalen süngdong crore 50 atemtsü atema programme ka benoka inyakogo aser 'Forest in India' kaket nunga Maharashtra nung arem litsü tuluba akümba sangdongogo, ta metetdaksü.

Paisa, tangbo sorkari süngdong crore 300 atemtsü atema tebilemba lir, aser ibaji state nung arem litsü shilem 33 atongtsü nükjidong nung lir, ta metetdaksü.

Maharashtra Economic Survey 2025-26 ajanga asadangtetba agi, tang Maharashtra nung ali tasazük 3,07,713 sq km nungi arem shilemji 16.5 dang lir.

National Forest Policy, 1988 kübok arem litsü shilemji 33 bo asütsüla. Scientific data amshia süngdong aika atemtsü aser region balala nung ali dak apet süngdong balala atemtsü, ta chief minister-i metetdaksü.

Iba mapatong nung arboriculturists, startups aser technologist temia shilem agitsü, ta paisa metetdaksü.



New Delhi, March 08, 2026: International Women's Day anogomong nung Ministry of Women & Child Development-i ayongzükba 'Shakti Walk' sentong nung Delhi Chief Minister Rekha Gupta densema tangartemi shilem agiba noksa nung angur.



# TIR YIMYIM YIMOBILEM (EDITORIAL)

DIMAPUR MONDAY, FEBRUARY (METSÜREMI) 09, 2026

## Temeim agütsüdi

**K**üm shia alima ajunga nung March 08 nü alikintem Tetsür anogomung amunger aser yashia kasa anogomung ya alima tesem balala nung sentong tapu balala yanglua mungogo. Aji oda, asen lima nunga tajung kaji yimteni dang masü saka arogoi dena tenla kidang tapet sentong renema tetsürtem asoshi sarasadem mapang agiba ajangshiogo. Atangji, tetsürtemji teburtem atema tangar masü saka temeim ojala, temeim kinungtsü aser temeim oyala aser tenüla nungertem lir. Anungji, parnok dang meima tajung inyaksübaji angati amajok nung endokba mapa ka masü, saka parnok dang meimba temeim mapatemjibo parnok asenok dang meimba agi asenokia meyiper meimba mapa ka dang lir, anungji ibaji teburtem asoshibo sentsü aoba mapa ka dang asütsü. Ibaji angateta, teburtemi tetsürtem dang tali meima akhümtsübu amshitsübaji kibong nung dang masü saka lokti aser yimten nunga kanga nungdaker. Iba tangatetba nung 2026 küm Alikintem Tetsür Anogomung omen ya "Ajangzüksü asoshi Agüjang" (Give to Gain) ta shimteta lir. Atangji, taküm küm atema tetsürtem asoshi mungtsüba anogobo süiogo, ajisüaka anogomungi agütsüba omenji, talisa, teburtem asoshi teinyaktsü mapa tajung ka kümer, anogo shia tetsür asoshi mapa tajung inyaksü bilema alitsübaji kanga tongtumbang kümogo. Alima nung tetsürtem anogomung anogo balaka shimteta amungtsüba akümba ya taoba putu tetenzüklen tetsürtembo nisung masü amai dang mapa nunga teburtem dang nungi mapang talangba inyadaktütsü aser taabo tajemba agütsütsü ta mezügmeshiba mapatem anema tetsürtemi nokdakba tongpang nung takok anguba asoshi tepelamung amungtsü tenzükba sentong ka liasü. Atangji, iba anogomung amungba nükjidongji tetsürtema teburtem den kasasa nisung rongnung züngoka amshitsü aser khuret abentsüsa ajungshiteptsü asoshi lir. Aji oda, iba ama anogomung nung tetsürtem temeten dang masü saka tetsürtemi inyaksüba khureta tetsürtemi angateta bentettsüsa tangatetba agütsür. Ibayongji, tanübo alima aika nung tetsür tebur kecha tebandang mali, ali senmang süli mesüra yimten, lokti aser arogo nung süli takokeri amanger aser takokeri khuret agizüka kibur küma inyaker. Aji oda, alikintem tetsür anogomung amungba ya alima kintem aika nung tetsürtem yimten, lokti aser arogo nung nüchiso anguba anogo ama munga pelateper saka ano kar asoshibo tanga yimten aser lokti nung temeten asoshi noktakba anogomung lir. Koba ama ka tangatetba nung mungdir mungang, iba anogomung yagi tetsürtem ya alima nung teburtemi kanga meima aser akhümtsübu amshitsüba purtem lir ta nenshia metetdaktür. Aji oda, kibong nung süli, lokti nung süli, kodang tetsür peladir ajak pelar aser kodang tetsürtem dak temetetba aser tangatetba tajung lia tejakleni odir, parnok den külemi ajak tejaklen aoer, anungji tetsür ka tajung akümbaji ajak tajung akümba den kasa lir. Nübener kibong nung jabaso 9 aser jala ka dang ser tsüraburtemi timtema mesütettsüa akok, saka tatem nungbo tsürabur anapronglaji jalar kidang jala ket nungi dang pilatsüa akok. Aji oda, aiben asenok loktiliba nunga tagitsübo ajunga tebur saka mapabo ajak tetsür ta asüba asenok sobaliba amai küma benschir. Atangji, ibaji teburtem dang nungibo tetsürtem dak temeim taliba aliba agi asütsüa akok. Iba ama temeim agi tetsürtemi khuret talila benloka agütsüba angudang, teburtemia tetsürtem dang temeim sayua tenüng asangtsü, parnok mapa nunga asemtsü aser teburtemi tetsürtemji parnok dang nungi teküpbokba purtem masü saka parnok aliba agiang teburtema alir ama bilema akhümtsübu meimtsübaji tebur ka taküm asoshi kanga tongtumbang asütsü, kechiyong tebur tetsür dang meimbaji peisasa pei meimba den kasa lir. Atangji, tanü putu nungbo ya tebur mapa aser yabo tetsür mapa ta mali, mapa dak atsüapong maket, shibai reprangdangteter aser shibai akoker pai mesüra lai inyaker. Aji oda, tetsür anogomung omen nung ashi ama, agütsüba agi ajangzükür süra, tetsür tebur ta mali, asenok ajaki pei akok, o agi ajungshiteptsü aser mapa agi yariteptsü ta meimtepa alitsü merangdi.

## OLEMSABANG

### NISUNGI TSÜNGREM TEBILEMBA TONGTETSÜMAKOKER

~ M. Meren, Ex.pastor Ungma.

Asenok meimchirtemi Tsüngrem metettertembo kodanga masütsü ama mesüra Tsüngrem tenzükertembo kodanga lentong majurutsü ama bilemer, aser Tsüngrem lar kar timtem ajurura kechiba ta asüngdang aser pa mesüra lai aibelena aka asütsü südi ta jembir.

Alima ya Tsüngremi tamasayongi mojing ket nung tokja lir anungjitang kodang Tsüngremi satan alimai arizüka yok iba mapang nungto Tsüngremi yamai shia lir. O alima na asoshi aiatai, kechiaser satan ne dangi aruogo ta ashiba angur, anungji tetenzük nungi alimaji aiatai tia nung tokja lir. Kechiaser satanji alima nung amongtsü aru aser pa mapaji kujang kata tajung mali, pa mapaji ashioktsütsü, tepsettsü, samatsütsü, rishikangshitsü, sensakroksü, nükmeremtsü, ochi mashi mapa inyaksü, kechiaser satanji tiyazür tebu lir yamaji pa mapaji kecha nunga tilakata tajung mali, kechiaser alimaji pa kibur ama lir, anungji alimaji kodanga sünepa maliba lima, anisüngzük makaba lima aser nükztü ayimba lima lir aser aji satan mapa. Satan teinyaktsü ajak agi yamaji inyaka jajatsüba dak alaka tajungba kecha maka.

Akidang putu nung Yober kibungji Uz lima nung liasü, aser Uz lima ya tanü asüng bushidangra Syria lima nung liasü südi. Aser Par lima alirtemi Yober kibungji ajak dang temeshitiba ama bilema liasü, saka kenüyongi par kibung nung par lima alir ajaki süngmangtsüsa tatalokba tulu ka atalok aser aji kenüyongi par japaso tenet aser jala anung petinu ama perangshia aliba asem ajak agi par terprongla tsüngsak tulu arua ki jirepba zükset, par lima asoshi aji tansütsüka liasü, par lima alir ajaki aji par alang ajuru ta bilem saka anogo shia parnok ter asoshi tebu tarongba tenla agüja tatok meshija kenüamati inyaka aru, ajitang masü saka par kibungi nungdakupur ajak yaria aru, par kima sensaker aser meshimetsür agi sünga nokdaktena liasü aser ajakji teka tazüng shinga meyiba meyok saka par kibung nung tansütsü aji atalok. Asenok asoshia aji tasüngdangtsü tulu lir. Anogo shia par kima nokdaka meshimetsüa aliba nisungtemiangsüng par alang ajuru ta atala, tilutsü. Ano ajitang masü par rongsen samabaji alimai mezüngdangmatsüsa tulu liasü saka iba rongsen asoshibo Yobi mezüngshi saka kenüyongi japaso jala ter ali nung aremstüba koda tesüngmangtsü liasü, Chumo Arogoi par punguprongla leper ka nung remtsüba angudang ni kanga pela, shiba shisa taka ajanga mapa tajung yamato inyaktet ta tenungsang agütsür. Yober japaso jala terprongla Chumu Arogoi inyakba amaji leper ka nung remtsüogo südi ta nibo bilemer, kibung ka nungi paikaji remtsütsüba aji shir molung agi akoktsüba, ibaji satan mapa, satani iba amaji inyaksütang bushir, yamaji atalokba jagi par japaso jalatemji nisung tamajungpurtem liasü ta shibai shitettsü?

18 centure mapang nung D.L. Moody aser Sanki tena metemer liasü aser tena ajanga tanüla anir aruba asentenshi tulu adokdaktüba mapang ka liasü aser parnok den anogo shia yariteba jajar kibung tajung ka liasü shiba G. Spafford aser kinungtsü tena den jala pezü liasü aser D.L. Moody par dang anendang par jala pezüprongla Tanüla temeshi tejangja agizüka tekümtet jangjaba jala pezüji liasü. Kenü par kibungji Europe limai apusutsü renem saka ajungbena tebuji motet saka tetsü den jala pezüji anir English nung rong tulu ka nung mener 1873 November 12 nung apusu, aser aji Dr. Clark Molungi mezüng atuba küm ser teküma liasü. tebuja yakta arua asenok England nung ajurutepdita jembir senshi, saka tia maka rong kati par kibung mena aliba rong dak atsük, anungji iba lentong nungji jala pezüprongla tzüyim nungji arakset saka sayatenya ka ajanga tetsüji anarongtena kümzük. Aser tetsüi kinungbo dangi ajungben osang ka yok, "kijatang kümzük" iba osang angashile kinungboji apusua aritepba aru, kodang par jalatem araksetba tzüyim atong kinungtsüji jepba tzüyimkum nung mena liasü, aser iba tesem nung lentongji atalok ta kodang tebu dang ashi, pai mang ayimtsü melena paper ka bena aru aser idakji tebu ken ka mejem,

Ken no 384. Kü den ayong ama sünep alidang

Tejashi tulu alidang,

Tia ajak nung yak kü nem shidaktsür

Kü den ya junga lir, junga lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

## Odisha nung Hindu nunger telok kati Tenla ki ka amak



March 3, 2026 aonung Odisha nung Hindu nungertemi amakba St. Paul Arogo Tenla ki noksa nung angur.

**March 07, 2026:** March 3, 2026 aonung Odisha state nung tribal Hindu nungertem telok kati Tenka ki kapoka atuba sülen Tenla kidang oset aika raksatsü.

Rayagada district kübok Dengaswargi yimdak aonung 9:00 ako meta Hindu nungertem jagi St. Paul Arogo Tenla ki kishiji kakpoker telungi atu, ta putir Abed Kumar Khura-i metetdaksü.

March 5 nü osangbenertem den jembidang Khura-i, lokti jagi Tenla kidang temeshi sabang raksatsü aser Kangki raksatsüba den külemi Laishiba, putir süoshi, menden, pangka aser electric wiring

raksatsü, ta metetdaksü.

Iba yimdak tamalen Hindu nungertemi Khristan kibong asem amokmerena liasü. Iba sülen March 4 nü Khristantemi police nem ken o agütsüogo.

Police team ka den vicar general Shanti Chandana Pani aser Khura nunger densema Arogo nung lenirtemi iba yimji semdanga teraksatsüba asadangogo.

Iba yimdak Khristantem nem security agütsüogo saka tang tashi aibelenertem mapu.

United Believers Council Network of India nungi Bishop Pallab Lima-i, tang Tenla ki amakba ya Khristantem amokmerentsü nükjidong nung

inyakba lir, ta ashi.

Lima-i, "Khristantem tanaben Hindu yimsü dangi meyidaksütsü nükjidong nung Tenla kitem amaker," ta metetdaksü.

2024 küm Odisha nung Khristantem anema inyakba tatalokba 40 liasü; item tatalokba rongnung tekülem sentong tagidak mapang timtem agütsüba, yimtsüng nungi meindokba aser tasü mang meremdaksüba densema lir (United Christian Forum data).

Nütsüng million 42 aliba Odisha state nung nütsüng shilem 2.77 dang Khristantem lir.

## Ethiopia nung yimsü alia amangertemi Orthodox Khristan 30 tepset

**March 08, 2026:** Tawa Ethiopia kübok Oromia region nung yimsü alia amangertemi amakba tatalokba ana nung Khristan 30 shi tepsetogo, ta Open Doors-i metetdaksü.

Ethiopia nung tamangertemi teimba Orthodox Church nung züngsemtem lir.

February 26 nü yimsü alia amanger telok kati Oromia region kübok Arsi Zone nung aliba market ka amakdang Orthodox Khristan 20 tepset aser kar sama.

Kasa telok jagisa Tenla kidangi tua amakdang putir ka densema Khristan aika tepset. Iba sülen kasa telok jagi ki kar nung mi sensotsü aser alu nunga mi senokja liasü.

Akhidang nungi iba tesem nung Muslim nungertem aser Orthodox Khristantem tesü nep nung dang lia aru, ajisüaka tawa iba tesem amakba ajanga aika süngmangteper.

Iba tatalokba sülen anogo ana lir February 28 nüa yimsü alia amangertemi amakdang

Tenla kidang Khristan tenet tepset. Kasa telok jagisa amak asü tanga telok kati amakar ibaji tang tashi nungbo mejangjar, ta ketdangsertemi metetdaksü.

Open Doors-i, "Item tatalokba ana ya talisa Orthodox Khristantem anema asalentong yanglur inyakba ama asadangteter. Parnoki Arogo nung züngsemtem aser Arogo nung lenirtem anema inyaker. Iba region nung ozüng benokba ketdangsertem kanga ajema lir, anungji Orthodox Khristantemi lendong melamela ajurutsü," ta metetdaksü.

Sub-Saharan Africa nung Open Doors otongdar kati, "Ethiopia kübok Oromia region nung item ama tatalokba atema onoki tebilemtsü akar. Item ama tatalokba ajanga nisung aika jenshir. Tesüiba küm aika Orthodox Khristantem aser Muslim nungertem tesü nep nung lia aruogo, ajisüaka tawa item tatalokba ajanga yimsü balala amangertem tsüngda

yimjung raksatsüa akok," ta metetdaksü.

Laisa, "Onoki Ethiopia sorkar dang Oromia region nung aliba nübur ajak kümzüka alitsü atema inyaksü mepishir aser aibelenertem nem temerenshi agütsü daksüner. Onoki alima nung Arogotem danga item nübur atema sarasademjang ta mepishir," ta metetdaksü.

## Tang alima nung Khristan million 400-i reshikangshi ajangshir

**March 08, 2026:** Tang alima nung Khristan million 400 jungnuai reshikangshi tapu balala ajangshidar, ta Archbishop Ettore Balestrero-i metetdaksü.

Taoba hopta Geneva nung United Nations senden nung jembidang Ettore-i, tang alima nung Khristan tenet shia nungi katibosa timtem ajangshir, ta metetdaksü.

"2025 küm kija nung pei tamang atema Khristan 5,000 jungnüa tepsetogo aser ibaji anogo shia Khristan 13 tepsetba amai lir," ta pai metetdaksü.

Pope Leo XIV-i jembiba o

## ANOGO ABEN TSÜNGREM DEN

### Tatem Maka Taküm

1 Yohan 5:13

Asenok tekümtet takümüji tetenzükba temoatsü lir. Tanü Lai jagi Khrista akaba tetezü taküm akaba ta sayur, kechiaser takümüji techir dak lir. Iba taküm tongtipangji tanelaren lir aser ibaji agütsü kechiaser shirnokisa amanger ajak nem Pa taküm agütsütsü asoshi Kibuba Yisu asü aser shia aru.

Tanü Lai jagi iba takümüji "teti tatem makaba taküm" ta sayur. Ano o ka nung "teti tatem maka takümüji" Tsüngrem maongka ta ashitsü akok. Taküm nungdak ajakji meküta Adam dangi aor shibai pa menen asoshi tasüba timtem angu. Adam tashi meiti küma pa shi temang asütsü tenzük. Saka asüba tetezü langzüksü mokoki akümba masü. Iba tetezü pilaba. Asüba ajanga tanela aser takümüji shi temang nungi pilar aser temangji shizüka aor. Tanelaren asüabajia Adam temenen ajanga adok. Pai temenen mena nung Tsüngremi pa Eden nungi aridok. Nisung aser Tsüngrem pila aser Tsüngremi pa sobutsütsü asoshi temelen ka magütsü asübo Adam teti asoshi sür lila.

Teti tatem maka takümüji tetenzük aser tatembang maka. Asenoki ibaji amangba second nungji agizüker kechiaser idakjisa Khrista aita alir. Melentepba ajanga asenok tasü nungi Tsüngremer taküm kadaktsür. Teti takümüji tetenzük lir saka tatembang maka. Asenok temenen tatokba asoshi amangba second nungi asenok taküm alitsü tenzüker. Ozüng raksaba aser temenen ajanga asenok tasü liasü, saka Tsüngremi pei chir sempet agütsüba ajanga asenok taküm lidaktsü. Tsüngrem chir dak amangba anogo nungi teti tatem maka taküm aser teti taküm anapronglaji tenzüker.

Iba taküm tejangja alibaji leman ana nungi jangjatsü akok. Mezüngbuba aser tongtipangtibaji Tsüngremi Pa O nung nangzükba ama tamang kateta aliba ajanga lir.

Tanabuba kuliji nisung shia taküm libaliro aser mapa, chiyongtsü jangraba, mapa inyakba, mapa inyaksü mulungtetba aser jakla ajanga kuli sayur.

Oba, Nai Ne chir ajanga taküm agütsüba asoshi Ne tenüng asanger. Ne tenangzükbatem nung ni mulung lemtetta ali nung ni iba taküm kar ta ni metet.

lepshia Archbishop Ettore against Christians in Europe Balestrero-i, "Tamangba yimsü telokia Europe nung Tenla ki temeden ya meimchir temeden raksatsüba aser Khristantem amokmerenba tatalokba 2,200 ka lir, ajisüaka iba ya meimchir amokmerenba tatalokba 2,200 temeden masü masü saka dak tali aliba metetdaksü.

Archbishop Ettore Balestrero-i, "Khristantem amakba ya Kangki amakba den kasa lir," ta ashi.

Aid to the Church in Need (ACN) International-i ashiba agi, 2025 küm tamangba yimsü temeden anema inyakba linük

2024 küm Europe nung 62 liasü aser sensotem bendanga züngshiba linük 38 anema inyakba tatalokba 760 liasü; ibaji ajanga alima nung liasü aser Observatory on Intolerance & Discrimination kongshir.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Wabetsa**

(n) atanga masü, lendena masü, lataka aliba tesem (slope)

\* Wabetsa aliba tesem nung nisung alitsü junger.

**Wabi**

(n) tezüng talang aliba azü (hairy dog)

\* Azü wabi ya tanurtemi kanga meimer.

**OLONG PAITEP # 7437**

1		2		3		4
		5	6	7		
8						
		9				
	10					
					11	12
		13		14		
15				16		

**TIPLÉN**

- 1. Anenzükdak ki
- 3. Asür mangyimba
- 5. Temulung nung shisadang
- 8. T\_\_\_lu
- 10. Takdang temalen
- 11. Tesa\_\_\_a
- 13. Ajungbena temulungjang tonglonsü atu
- 15. Tejen lai nung tesayur
- 16. Tsünsak-mopung

**LANGTSÜNGLEN**

- 1. Reprangdaksü
- 2. \_\_\_ur
- 4. Kiojen yangludak
- 6. \_\_\_\_\_ait
- 7. Nagaland nung ayong ka
- 9. Küm kasa purtem
- 10. Tetsüng tajemetdak
- 12. \_\_\_adenshi
- 14. Tsünüsenbongsü adokdak

**OLONG PAITEP # 7436 TELANGZÜBA**

**TIPLÉN :**

- 1. Aben, 4. Artsü, 7. Lisem,
- 8. Liwa, 9. Sarasadem, 12. Aket,
- 14. Mangu, 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Süjak, 10. Aonung,
- 11. Dokan, 13. Tinu.

**NAI-A YA METETTER**



Iron Beam ya Israeli defense contractor Rafael Advanced Defense Systems ajanga yanglutetba directed-energy air defense system ka lir.

Iron Beam nung 100 kilowatt solid state laser amshir aser iba tashi ajanga targets mi agi rongdoktsür. Israel indang integrated missile defense system Arrow 2, Arrow 3, David's Sling aser Iron Dome sülen Iron Beam ya fifth element lir.

**Assam nungi shidi ka temelaba melii Rajasthan-i bener ao**



**Guwahati, March 8, 2026**

(Agencies): Assam kübok Lakhimpur district nungi shidi tebong ka Rajasthan-i bener aoba atema ashishitep ken o ka adokogo.

Rajasthan nung wildlife authorities dang nungi mandatory clearance manguba atema forest ketdangsürtem dak tai tongloksür.

Iba shidi tenüng "Mohan" lir aser Rajasthan kübok Amer nung yua lir. Saleem Khan ta ser

nisung ka ketdangsüba kübok shidiji tawa tu bener ao ta osang angazüker.

Assam nung Chief Wildlife Warden (CWLW) Vinay Gupta-i tour permit ka agütsüba nung ajemdaker shidiji bener ao. Ajisüaka, Rajasthan nung Chief Wildlife Warden nungi No Objection Certificate (NOC) magizüki iba mapa inyak aser inter-state movement atema NOC ya nüngdaker.

District Divisional Forest

Officer (DFO) Monoj Kr Goswami mapa mebelendang shidi ya bener ao aser iba jagi Assam CWLW Vinay Gupta tena dak tai apur ta Forest department ketdangsürtemi ashi.

Wildlife (Protection) Act, 1972 ajanga shiditem inter-state belentsü atema state anaprong nung CWLW nungi temelaba alitsüla ta lateta lir. Rajasthan nungi NOC maliba ya statutory norms alema inyakba lir.

Lakhimpur, Digboi aser Karimganj nungi shidi asem Manas National Park nung yua lir aser shiditem ya Assam nungi bener aotsüba sentong lir ta osang angazüker.

Assam nungi tanga state temi shidi 18 shi belentsü atema network ka tenteta inyaker. Iba mapa ya Uttar Pradesh nungi Asif Ahmad ta ser nisung ka den pa kinungsü nati inyaker ta ashir.

Retired senior forest ketdangsür ka shiba tang forest department nung consultant inyaker pa den Bokakhat nung shidi kibur kati iba network nung yariteper ta osang ajanga ashi.

**KOHUR-i Kuki-Zo tetsür aluyimertem amakba aitsür**

**Imphal, March 8, 2026**

(Agencies): Saikul nung Kuki-Zo tetsür aluyimertem amakba khukhua aitsür ta Kuki Organisation for Human Rights Trust (KOHUR)-i metetdaksüogo.

March 7 nikongdang 2:30 ako meta Tingpibung aser Leplen Kuki tsüngda alu nung

iba ya atalok. Iba mapang tetsürtemi alu mapa inyaka lia amak ta KOHUR-i ashi.

Tetsürtem alu teinyakdak nung amakba ya humanitarian norms alema inyakba lir. Ibala tatalokba ajanga Manipur nung lisopurtem taküm lendong nung aliba sayur ta parnokisa ashi. KOHUR-isa bangdakpur

dang bushisüngdang asütsü aser iba mapa inyakertem maitüsü jangjatsü takhangba agütsüogo.

KOHUR ya Indian Registration Act kübok register süa lir aser 2016 nungi United Nations Economic and Social Council den Special Consultative Status yua lir.

**Mizoram sorkari UGC NET malir meshimtsü: Minister Vanlalhlana**

**Aizawl, March 8, 2026**

(Agencies): Mizoram nung University Grants Commission (UGC) indang eligibility criteria matongertem college tesayur ama meshimtsü ta Higher and Technical Education Minister Vanlalhlana-i metetdaksüogo.

Sorkari Rashtriya Uchchar Shiksha Abhiyan (RUSA) scheme kübok tesayurtem regularization asütsü inyaker ta pai ashi.

UGC-i lateta aliba ama

National Eligibility Test (NET) majangertem sorkari meshimtsü ta paisa metetdaksü.

March ita tatemlen tesayur appointments tembangtsü. Ajisüaka iba tebilemstü ya tesayurtem ajanga masü ta Minister Vanlalhlana-isa ashi.

Tesüiba nung job advertisements mapang NET alitsüla ta telatetba maliasü aser sorkari parnok shimokba sülen ang iba qualification mandatory kumdaksü ta paisa ashi.

2019 küm RUSA kübok Mizoram Public Service Commission (MPSC) ajanga tesayurtem aniok ta Vanlalhlana-isa shisem.

Tesayurtemi küm ana ajungba sülen parnok Centrally Sponsored Scheme kübok classified masür ta paisa metetdaksü.

Zoram People's Movement (ZPM) sorkari item tesayurtem regularization indang inyaker aser iba ya Council of Ministers nungbo jembiogo.



Manipur nung anogo pungunü Yaoshang festival alidang police-i telungpur pungu tashi puogo. Telungpur telok balala nungi züngsem pungu apu aser parnok ket nungi prangpong-injangtem dena puogo ta Manipur Police-i metetdaksü.

## Iran totzö ayudak aser yangludak tesem amak

**Tehran, Metsüremi/March 08 (Agencies):** Rara tenzüker tang mezüngbuba Israel-i tayimtsü amshia Iran indang oil facilities amakba sülen Tehran anüing mokozü tanak agi sünger lir, aser iba mapang nisung pezü tepset.

Israel aser United States külemi Iran nung amakba Deobarnü ago anogo toku ajunger aser iba rara nung Iran nung nisung 1,300 dak tema aser Lebanon nung nisung 300 shi tepsetogo. Israel nunga nisung ter dak tema tepsetogo ta ketdangsür temi ashir.

Honibarnü Tehran aser Alborz province nung totzö ayuba tesem pezü aser oil production transfer centre ka amakba ajanga mi tulu adok, ta Fars news agency ajanga ashir aser Iranian state media-i iba ya US aser Zionist regiome nungi amakba ta ashir.

Tehran northeast tsütsü Aghdasieh oil warehouse, south nung Tehran refinery, Tehran anüolen Shahran oil depot, aser Karaj yimti nung oil depot ka amak. Shahran depot nungi totzö ya yimtung nung yimshir ta tenük kuli alirtemi ashir.

Tehran aser Alborz nung amakdang tanker driver pezü tepset, ta Fars ajanga ashir. Yamaji makaka, totzö agi anüingba mali aser security forces temi mi remsepba mapa inyaktar, ta ashir.

Israel-i, Tehran nung military infrastructure ama amshiba totzö ayuba tesem kar amak ta ashir.

Tehran nungi osangbener kati civilian industrial facility amakba ya tesüiba mapang kodanga majangshidang ta ashir.

"Tang ya mezüng masü. June ita nung anogo 12 raraba

mapanga fuel depots tem amak, saka ibai tang mezüng lir. Linük yimtiba nung rara aser libajen tsütsü tensa kanga mejungi lir," ta osangbeneri ashi.

Deobarnep pa indang windows nung tzünglujang tanak anguba pai ashi.

Ano Tehran nungisa osangbener kati, totzö ayuba aser yangluba tesem amakba ya Iran nung tsübodaktsütsü atema "psychological war" nung shilem ka lir ta ashir.

Iran nung totzö agi anüingba tensa ka arudaktsütsü meranga Israel nungeri yamai amaker, ajisüaka Iran ya linük tulu aser iba ama facilities aika lir, anungji totzö agi kanga anüingbabo malitsü, ta osangbeneri ashi.

Kasa mapang Iran-ia Bahrain nung Manama nung Juffair District kübok United States Navy's Fifth Fleet maka sepa 21 tepset, ta Tehran Times ajanga ashir. Parnoki video prokshiba nunga iba tesem nung mi adoka liasü.

US Navy's Fifth Fleet indang headquarter ya Naval Support Activity Bahrain, Manama nung lir, aser Iran sepaitemi missile aser drone indang indanga khalokja timtem agütsür.

February 28, 2026 nü Iran indang Islamic Revolutionary Guard Corps (IRGC) ajanga ballistic missiles aser Shahed-136 attack drones amshia Fifth Fleet headquarters maka liasü.

Iba tesem ungi mokozü tanak adokba satellite noksa aser video tejangja nung nguogo. Radar facilities, service buildings aser satellite communication terminals densema ki o jen aika samatsü mesüra kanga sashia raksatsüogo ta osang ajanga

ashir.

US ketdangsür temi sepa ajunga bunkers nung lia amak ta ashir aser region nung American sepa asem asü aser kar yiru saka Bahrain base nung asü-amaba tejangjabo mali.

March 6, 2026 nü US submarine kati torpedo amshia Indian Ocean nung Iranian warship ka tzüyim telungi yoka linük ana tsüngta tzüyim nunga tensa kanga mejungi kumogo.

Maneni Iran nung tashi tulu aliba Assembly of Experts temi linük indang Supreme Leader akumtsü asoshi telemtetba agiogo, ajisüaka parnoki shima aliba putir indang ano yimjak nung mesangdong, ta Iranian media osangtem ajanga ashir.

Iran nung tematiba lenir shimtsü mapa nunglokja aliba telok nung züngsem temi tangatetep kati aruba jangjatsüogo. Supreme Leader Ali Khamenei tepsetba sülen iba Assembly ya ayongtepa liasü.

"Assembly of Experts nung timbai agizükba candidate tetemsüba jangjaogo," ta Khuzestan province nungi iba telok nung züngsem Mohsen Heydari-i Islamic Republic News Agency dang ashir.

Israel den tensa tamajungba akumba mapang lenir melentsü ajurur, aser Iran indang supreme leader tasenba ya 'target' ka akumtsü ta Israel-i tekumdangtsü shia lir.

Khamenei shibai melendir melenaka samatsütsü, ta Israeli Defence Minister Israel Katz tawa ang shia lir.

Iba yongji Iran nung putir temi region nung rara adoka aliba mapang lenir tasen shimtsü mapa kanga kumdanga inyaksangshir.

## Sür Küm ka Ajungba Menungra Bilemteter



Asür Tsürabur Odibendang  
Tasüba anogo : 09.03.2025

Temeim Obala, pungmang ama ka nü akümüli tembanger küm ka süitema arudang, onoki na tali menunrar. Ne jak tesangwa aser ne temeim kodanga mamateter. Na onok mulungjang nung teti alitsü.

- Temeim Kinungtsü, Chirnurtem & Kinungertem.

## Office of the DIMAPUR WAMEKEN SENSO TELONGJEM



### TENÜNGSANG AGÜTSÜR

Kr. IMSUMENLA IMSONG

(D/o Mr. I. Temsulmsong & Mrs. Alila Longkumer)

Nagaland University nungi MA (English) Post Graduate Exam nung Gold Medal ngutetba asoshi sensosanger-i konang tenüngsang agütsür.

Jala taküm ano maneni shisaliok lenmang nung asen tulusang Tsüngrem-i takok nung len aniangma ta asen sensosanger sarasadem.

Sd/-

Wb. T. Lanu Jamir  
President, DWST

Sd/-

Wb. Imlitenzuk Jamir  
G/Secretary, DWST

## Russia-i missile aser drone amshia Ukraine amak; nisung 10 tepset

**Kharkiv, Metsüremi/March 8 (Agencies):** Russia-i Honibarnü aonung sangwa-a drone aser missile amshia Ukraine amakba sülen infrastructure balala raksatsü aser Kharkiv yimti nung tanur ana densema nisung 10 tepset ta Ukraine nung ketdangsürtemi metetdaksü.

Ukraine tir Volodymyr Zelenskiy-i ashiba agi, Russia-i linük kübok tesem balala nung energy sector aser railway infrastructure tem dak tenük yoker inyaksangshia liasü.

"Meimchir taküm agitsüsa yamai amakba ya partner temi telangzüba agütsütsüla," ta Zelenskiy-i Telegram app ajanga ashir.

"Russia-i Ukraine indang residential aser tongtambang infrastructure tem raksatsütsü maneni merangdar, anungji onok maneni nongita yaritsüla," ta Zelenskiy-i ashiba den, partner tem dang air defence aser prangbong injangtem maneni agütsütsü mepeshia liasü.

Kharkiv Mayor Ihor Terekhov aser regional prosecutor temi yimti nung nisung 11 asü ta shiogo, koba Zelenskiy-i sangdongba dang nungi ka agi timba lir.

Kharkiv regional prosecutor temisa, Honibarnü tanga

tatalokba ka nung Russia arrtsü anasa yimtsüng ka nung post office ka anasa tesem ka drone agi amakba sülen nisung ana tepset, ta ashir.

Ukraine indang air defence unit temi drone 453 aser missile 19 khazüka yokogo, ta air force-i ashi. Ajisüaka missile teku aser drone 26 agi tesem 22 dak kongshia liasü, ta parnokisa metetdaksü.

Russia-i drone aser missile amshia Kharkiv yimti amak aser tanur ana densema nisung 11 tepsetogo. Russia indang ballistic missile kati ponguben tashi atongtepa sür aliba nisung aliba ki ka dak kongshiba sülen item nisungtem ya asü ta Terekhov-i ashi.

Kasa mapang nung Russia indang Defence Ministry-i ashiba agi, parnoki manger mesangwa tsüngda Ukraine nung military-industrial complexes, military airfields aser energy facility tem makogo, ta Interfax news agency-i metetdaksü.

Kharkiv nungsa nisung 15 yiru aser nisung aliba ki 19 raksas liasü, ta Kharkiv Regional Governor Oleh Syniehubov-i ashi.

Commercial aser administrative kitem, electricity lemshiba tezü aser garitem kongshia liasü, ta paisa shisem.

## MH370 tayimtsü maneni bushitsü mepeshi

**Kuala Lumpur, Metsüremi/March 8 (Agencies):** Malaysia Airlines tayimtsü MH370 koba küm 12 tejangdang sama liasü, iba tayimtsü nung mena aliba kinungertemi Dobarnü Malaysia sorkar dang deep-sea exploration firm Ocean Infinity den iba tayimtsü bushitsü atema tenangzüktepba yanglur aliba ya atsülangshia maneni bushitsü mepeshia asüngdangogo.

Boeing 777 nung ya passenger 227 aser crew 12 mena liasü. Iba tayimtsü ya 2014 küm March 8 nü Kuala Lumpur nungi Beijing-i oya aliba mapang lentom nung samatok aser tang tashi kong sama mejangjai lir.

Iba sülen southern Indian Ocean nung iba tayimtsü bushitsü maparen atema aiben benoka inyaksangshio, saka tang tashi monguteti lir.

Malaysia-i taoba küm March ita Ocean Infinity nem "no find, no fee" principle kübok iba tayimtsü bushidaktsütsü mulunga agizük. Iba firm yagi tayimtsü ya ngutetra USD million 70 agütsütsü nangzüktepa liasü.

Malaysia indang Air Accident Investigation Bureau-i Deobarnü ashiba agi, tang tashi nung operation balala benoka inyakogo, saka kecha monguteti lir. Anogo 28 tsüngda tzüyim bonglang nung 7,571 square kilometres (2,923 square miles) ayimjema anaben tashi bushiogo.

Bushisüngdangba maparen ya tsüngsang majungba aser tzüyim nung tzüsem yipru balala aitba ajanga mapang shia minpronga liasü aser tanabuba shilem ya January 23 nü tembanga inyakogo, ta AAIB-i ashi.

"Kinungertem nem osang maneni agüja alitsü sorkar bendanga agütsür lir aser maneni agütsütsü," ta parnokisa shisem.

Tayimtsü nung samaba kinungertemi tentetba Voice370 telok yagi ashiba agi, June ita contract tembangtsü lir, saka iba masü dang Ocean Infinity puri mapa benoka minyaksü akok, kechiyong southern hemisphere nung asükwa arur aser tzüyim mesüngjemba küma odar.

Parnoki sorkar dang iba tenangzüktepba atsülangshitsü atema Ocean Infinity puri kechi mepeshidir ajak agizüktsü mepeshia asüngdangogo.

Malaysia nung bushisüngdangtemi iba tayimtsü nung kechi atalok iba indang osang kecha mongutet, saka tayimtsü ya asa-a tangaleni anir ao asütsüa akok ta bilemba lemsatepogo.

# India-i T20 World Cup final nung New Zealand kokogo



**Metsüremi/March 8, 2026**

**(Agencies):** Deobarn aonung Ahmedabad nung T20 World Cup final asaya nung India-i run 96 agi New Zealand koka iba asayamung anabenbuba atonga

kokogo.

Final asaya nung mezüing batting amenba sülen India nung opener temi asaya kanga junga tenzüka toktsü aser parnoki asayar pongu out ser

run 255 yanglu, koba Brehostibarnü England den semifinal asayaba mapang yangluba run dang nungi run ana agi timba liasü.

India nung top three

asayar asempronglai kanga junga asaya liasü. Sanju Samson-i ball 46 nung run 89 yanglu, Abhishek Sharma-i ball 21 nung run 52 yanglu aser Ishan Kishan-ia ball 25 nung run 54 yanglua liasü.

Parnoki iba dang nungi run timba yangluteter lila, saka Jimmy Neesham-i over 16buba nung wicket asem agiba ajanga khen atema run yangluba anendakja liasü.

Ajisüaka Shivam Dube-i tatembangbuba over nung ano run 24 yanglua India team jenjang kanga junga kümdaktsü.

New Zealand pur atema Tim Seifert-i ball 26 nung run 52 yanglu saka pa nem teyari agütsür maliasü aser NZ nung asayatem kanga kara out süatok, kong semi-final nung century yanglusang Finn Allen-

a densema lir, shibai run teku dang yanglur tasembuba over nung out süatok.

Asaya nung Jasprit Bumrah-i ball kanga junga ona pai run 15 agütsür wicket 4 agia New Zealand pur nem over 19 nung asayar ajak out ser run 159 dang yangludaktsüba nung teyari tulu agütsü.

Iba asaya akokba tetezü India team ya tebur T20 World Cup anaben atonga akokba mezüingbuba team kümogo. Iba asayamung akokba den India-i toba white-ball asayamung asemprongla kokogo, kong 2024 küm T20 asayamung aser 2025 küm Champions Trophy akokba densema lir.

New Zealand team ya India-isa taoba küm Dubai nung kokogo aser 2015, 2019 aser 2021 aser taküm ta final nung tsükogo.

## India nung boxer tem Youth World Cup nung masayatet

**Metsüremi/March 8, 2026**

**(Agencies):** Indian boxing contingent nung asayar 10 Montenegro nung tang asaya aliba Youth World Cup nungi masayatetsüsa aküm. Middle East nung rara adoker aliba ajanga passport mapang shitak nung mongutetba sülen parnok iba asayamung nung shilem magitetsüsa aküm.

Times of India sangdong ka ajanga ashiba agi, boxer tem ya ketdangsürtem ket nungi mapang shitak nung stamped passport mongutetba ajanga World Boxing-i ayongzükba iba asayamung nung masayatetsüsa aküm, koba Mongolbarnü tenzüko. Asayamung ya Budva nung asayadar.

India nung Montenegro indang embassy mali asünung Boxing Federation of India-i,

United Arab Emirates nung Montenegro embassy ajanga visa ya achaayanga liasü, ta osang ajanga metetdaktsü.

"Visa inyakyim nung stamp ajenoktsü atema passport ya tonga bener aotsü nungdaker aser asayar tetsür pongu aser tebur pongu indang passport densema squad nung züingsem ajak indang passport UAE-i yoka liasü," ta source kati TOI dang ashi.

"Tanga mapang nungbo passport tem ya stamp ajenoker anogo ana asem tsüingda meyipa arur. Ajisüaka Middle East nung tang mepetmesü adoker aliba ajanga visas stamp ajenoker liaka passport tem ya India-i mapang shitak nung meyoktet," ta source yagisa shisem.

Osang ajanga ashiba agi, passport tem ya visa stamping

atema February 20 nü agütsü aser tayimtsü ticket bo standby nung yua liasü.

"Ibayongji Indian youth contingent nung züingsem 10 iba asayamung atema Montenegro-i motet. BFI-i Montenegro nung ketdangsürtem aser Ministry of External Affairs den tongtepratepa aruogo," ta source yagi ashi.

"Visa tem ya email ka ajanga jangjar liasü," ta source yagisa shisem.

World Cup nung masayatetsüsa akümba sülen India U19 boxing squad tang World Boxing Futures Cup nung asayadar, koba Deobarn tenzüko. Team nung Gunjan, Chandrika, Joyshree Devi, Radhamani, Prachi, Ambekar Meetei, Udham Singh, Sahil, Aman aser Priyansh nung densema lir.

## Manuel Neuer yiruba ajanga CL nung Atalanta den masayatetsü



**Metsüremi/March 8, 2026**

**(Agencies):** Bayern Munich goalkeeper Manuel Neuer ano temola yiruba sülen Mongolbarnü Champions League round of 16 nung Atalanta den masayatetsü.

Bayern-i ashiba agi, parnok captain ya Hokolbarnü Bundesliga nung Borussia Moenchengladbach goal 4-1 agi akokba asaya nung tetsü yirua liasü.

Pa kodang nungi asayatetsü iba indang Bayern puri kecha osang magütsü, saka Bild sangdong ka ajanga ashiba agi, Neuer hopta anabo masayatetsü. Iba tetezü pa Atalanta den asaya anaprongla masayatetsü aser Bundesliga nunga Bayer Leverkusen den masayatetsü.

Neuer shiba iba ita arishi küm 40 ajungtsü, pa iba season temola yiruba ajanga asaya aika nung masayateti arudar aser taoba season-a iba amala mesükba timtem ajanga pa

asaya 10 tashi masayateti liasü.

Pa Bayern nungi iba season tatem tashi asayatsü atema tenanzüktepba yanglur lir. Neuer shiba 2024 küm August ita international asaya nungi anisüngzüka liasü, pai pa ano club jenjang nung küm kabo asayatsü masayatsü kecha osang magütsü lir.

2011 küm club nung adenba sülen küm 15 shi Bayern Munich nung asayaba mapang Manuel Neuer-i club tenung nungi tetoktepba balala nung asaya 520 dak tema nung asayaogo. Pai club nungi 500buba ben 2024 küm asaya liasü.

Bayern pur parnok indang Bundesliga title defend asütsü asoshi merangba mapang parnoki taoba hopta kanga dang tongtibang asaya ka kokogo. Parnoki tanabuba jenjang nung aliba Borussia Dortmund koka parnok point 11 agi timba kümogo.

## La Liga: Barcelona aser Atletico nati takok nguogo

**Metsüremi/March 8, 2026**

**(Agencies):** Honibarnü La Liga nung Athletic Bilbao akokba asaya nung FC Barcelona nungi asayar Lamine Yamal-i goal ka idakja parnoki asaya kokogo.

Iba asaya akokba sülen Barcelona pur point table nung tanabuba jenjang nung aliba Real Madrid dang nungi point pezü agi timba kümogo, shirnoki Hokolbarnü Celta Vigo koka liasü.

San Mames Stadium nung telok ana tsüingda kanga toktepa asaya aser goal idaktsütsü atema maongka aibenbo mongutet. Barcelona puri asaya mezüingbuba shilem nung goal idaktsütsüsa maongka aikabo meyangluteti asaya.

Asaya mezüingbuba shilem nung Athletic Bilbao puri goal idaktsütsü atema maongka kar

nguteta liasü. Asaya tanabuba shilem nung Alejandro Rego, Dani Olmo, aser Pau Cubarsi nung densema menaba foul nung team anapronglai red card meshi saka referee-i yellow card dang agütsü.

Iba sülen Barcelona puri minute 68buba nung goal ka ya idaktsü. Substitute Pedri-i Yamal nem ball agütsü, shibai defender Adama Boiro belentoker oa goal kanga junga idakja liasü. Iba ya pa asoshi season nung goal 19buba liasü.

Tanga asaya ka nung Atletico Madrid puri goal 3-2 agi Real Sociedad koka parnok La Liga nung pezübuba jenjang nung aliba Villarreal dang nungi point asem agi timba kümogo. Asaya nung Atletico atema Nicolas Gonzalez-i goal ana idakja liasü.

Team anaprongla iba hopta

tetenzüklen Copa del Rey final atema qualify süogo, anungji iba asaya ya Seville nung April ita final asayatsü aliba asayashiba ka mesüka lir.

Asaya nung Atletico puri Alexander Sorloth ajanga mezüingbuba goal idaktsü, ajisüaka asaya mezüingbuba shilem matem tsüingda Carlos Soler-i Real Sociedad atema-a goal ka idakja goal kasasa aküm.

Asaya tanabuba shilem nung Gonzalez-i Atletico atema tanabuba goal idaktsü. Ajisüaka Real Sociedad puri kanga kara telangzüba agüja Mikel Oyarzabal-i tanabuba goal idaktsü.

Team ana kanga toktepa asayaba sülen Matteo Ruggeri-i agütsüba ball ka Gonzalez-i kanga junga tongokja Atletico puri asaya akok.

## **BILEMDANGANG**

**"Minyaktangra akoktsü makoktsü mejangjatsü."**